

LUNA PIENA

Ligera sù i pedù,
Milieta a la ramina,
la spèta i tremezitt.

A mezanòtt l'incanta,
sóta la lùna piena,
la Guardia da Finanza.

La passa la bricòla.

IN TINTA SULFERÍN

Lügan, in lüs da Trocadero,
la pica fö la sira di füsett,
al festival da l'aqua culurada.

Vegn sü la lüna róssa da Cirene.
La còla giò adasi cumè un öv.

Sun chí fai sü in la nebia di culúr
e guardi fö in tinta sulferín.

LA MATINA L'È AI CROS

La matina l'è ai crös.
Vegn a gala l'ura dübia;
la sbrissiga
gió di albur da la nòtt.
In sü i ni trampìla ul dí:
l'è dí!

I pastuu da la Cassina
gh'ann in brascia i barinöö.
Sa fann là sül belvedere
par vidé quel sentiment
che sa punda in sü la vall.

E par ch'el fiöca.

QUEL'AQUA IN LUMBARDÍA

Sa tó via di scimett
un gran mant da ras rusement:
al sa alza
al fa cunca
sóta al vól da la culumba.

I campann da Santa Crus
— föra a sbalz cumè i tusánn,
in da l'unda da la scocca —
dann ul zegn: la matina
la va al largh
cui bandér che segnan vent:
luntán via la scascíga
la lienda di nebiett.

E quel'aqua in Lumbardía,
piana e lunga che sa ved,
gió in di pian che vann al mar...

I SANT DAL MÈ PAÉS

A pòrti la livèla,
e cerchi i punt da leva
ai pè dal Generus.

E fili sù da sótt,
dre via la dresina,
dal pian ai crèst di scim:
e vedi i piazz reginn.

— Oh i Sant dal mè paés
in tèsta ai pruccessiun:
Domenico Fontana da Milí,
Francesco Boromini da Bissun.

A cantan la Gluriosa
arent ai pòrt da bronz.

Veranda vaticana,
e l'Umbra che sa ved dre la tendina.

IN SÜ I RUNG G PENA NASSÜU

In sü i rung g pena nassüü
ghè quaidün che büta l'am.

La trütèla la sa möv,
legerina cumè l'unda
che tö sü la balerina
quand la vèrt föra ul balett.

Stell da l'aqua che lüsiss,
piant sül fund che slarga i man,
fiur cui rizz albent sótt'aqua,
pelizz piegaa da l'aqua.

Un filin da sangh al riga
la rungeta di slavazz.
La trütèla la scumbatt.

La delira
in dal fil che la strascina
fö di grött da la munina
al trapezi da la mòrt.

Mò l'è sü; mò la batt giò.
La mör via in dal zibièll.

Mi la guardi: l'è türchina
sü i vedritt da la pruina;

la sa ndòra, al prim suu
dre via i föi.

LÒDULA

Lòdula

ferma in ciel adèss adèss,
cunt i alett fai fò a crispín.

La ved i ermelitt,
fai dent in di pelizz
zafiir al pian di nev.

La stùdia i geugrafii.

A la sa lassa nà,
a fòia purpurina,
al praa di sgrazz zafrán
di tamuritt.

A balanzin
la beca i pumei giss,
la pulpa di sgalfiùn.

MAR CHE SA ALZA

Matina di lenzöö che quata i cà,
e rama d'argent nòv da la Ligúria.

Mar che sa alza al pizz di Scai:
a la riga zigrinada di prealp.

(L'è l vent, che rebatt scià, dal Monte Rosa)